

摘藻堂四庫全書薈要

集部

欽定四庫全書薈要卷一萬五千三百六十一集部

後山集卷四

宋 陳師道 撰

詩 五言律

寄外舅郭大夫

巴蜀通歸使妻孥且舊居深知報消息不忍問何如身  
健何妨遠情親未肯踈功名欺老病淚盡數行書

南豐先生挽詞二首

早棄人間事真從地下遊  
丘原無起日江漢有東流  
身世從違裏功名取次休  
不應須禮樂始作後程仇  
精爽回長夜衣冠出廣庭  
勲庸留琬琰形像付丹青  
道喪餘篇翰人亡更典刑  
侯芭才一足白首太玄經

暑雨

密雨吹不斷貧居常閉門  
東溟容有限西極更能存  
束濕炊懸釜翻床補壞垣  
倒身無着處呵手不成溫

送江楚州

濠梁初得意闕里舊論詩  
晚歲何多難經年始一辭  
淮人饑饉後良吏拊循時  
欲託山陽簿翁歸不受私

送江端禮

正學元非世能詩新有聲  
諸公文鄭泰多士閉何生  
汎愛經過數移書底裏傾  
又為淮海別兩眼向誰明

晁無咎張文潛見過

白社雙林去高軒二妙來  
排門衝鳥雀揮麈帶塵埃  
不憚除堂費深愁載酒回  
功名付公等歸路在蓬萊

丞相溫公挽詩三首

恭默思良弼詩書正百工事多違謝傳天遽奪楊公一  
代風流盡三師禮數崇若無天下議美惡併成空

百姓歸周老三年待魯儒時方隨日化身已要人扶玉  
几雖來晚明堂訖授圖心知死諸葛終不羨曹蜍

少學真成已中年託著書輟耕扶日月起廢極吹噓得  
志寧論晚成功不願餘一為天下慟不敢愛吾廬

巨野

餘力唐虞後沉人海岱西不應容桀黠寧復有青齊燈  
火魚成市帆檣藕帶泥十年塵霧底瞥眼恠鳧鷺

秋懷示黃預

窻鳴風歷耳道壞草侵衣月到千家靜林昏一鳥歸冥  
冥塵外趣稍稍眼中稀送老須公等秋碁未解圍

送張支使

曠度逢知晚高才處下難清秋一鷄上拭目萬人看白  
酒初同醉黃花已戒寒憑將衰老事一一報長安

送楊侍禁兼寄顏黃二公二首

相逢今已晚，同府尚經年。  
衆口不成虎，諸公更薦賢。  
兩親須薄祿，一障欲乘邊。  
往問顏夫子，何妨試着鞭。

多問黃居士，終年欠一書。  
因人候消息，有使報何如。  
向晚逢楊子，真堪託後車。  
親年方賴祿，不惜借吹噓。

送外舅郭大夫夔路提刑

天險連三峽，官曹據上游。  
百年雙鬢白，萬里一身浮。  
可使人無訟，寧須意外憂。  
平生晏平仲，能費幾狐裘。

雪後黃樓寄負山居士

林廬煙不起城郭歲將窮雲日明松雪溪山進晚風人  
行圖畫裏鳥度醉吟中不盡山陰興天留憶戴公

從蘇公登後樓

倏作三年別才堪一解顏樓孤帶清洛林缺見巴山五  
月池無水千年鶴自還白鷗沒浩蕩愛惜鬢毛斑

送秦觀二首

士有從師樂諸兒却未知欲行天下獨信有俗間疑秋



入川原秀風連鼓角悲目前  
狔犬類未必慰親思  
師法時難得親年富有餘  
端為李君御盡讀鄴侯書  
結友真莫逆論才有不如折  
腰終不補可但曳長裾

別負山居士

田園相與老此別意如何更  
病可無酒猶寒已自和高  
名胡未廣詩興尚能多沙草  
東山路猶煩一再過

次韻春懷

欲作歸田計無如二頃何  
折腰方賴祿拭面未傷和日

下鳥聲樂塵生鳥跡多渡頭留小楫乘興得相過

別叔父錄曹

為吏專文法成家託弟昆三年如昨日一笑更何言扶  
老須微祿移官實至恩兩疏元父子何日復東轅

泛淮

冬暖仍初日潮回更下風鳥飛雲水裏人語櫓聲中平  
野容回顧無山會有終倚墻聊自逸吟嘯不須工

十五夜月

向老逢清節歸懷託素暉  
飛螢元失照重露已霑衣  
稍孤光動沉沉萬籟微  
不應明白髮似欲勸人歸

胡士彥挽詞二首

晚進道前輩平生闕異聞  
吾猶識此老天豈喪斯文  
善學家傳業英詞世不羣  
固應譏尚白官序見揚雲

此地來何晚經年見未頻  
薦賢仍睹命有道可辭貧  
徒弟三千子聲名四十春  
襄陽耆舊內無復姓龐人

雪

初雪已覆地晚風仍積威木鳴端自語鳥起不成飛寒  
巷聞驚犬鄰家有夜歸不無慙敗絮未易泣牛衣

晚出

應俗敢辭疾衝風寧小驅聊為一日役不憚百金軀雪  
路無行迹冰枝有落鳥寒門閉蕭瑟窮里聽歔吁

寄答李方叔

平生經世策寄食不資身孰使文章著能辭轍跡頻帝  
城分不入書札訶何人子未知吾懶吾寧覺子貧

智寶院後樓懷胡元茂

晚渡呼舟疾寒城着靄深昏鷗明鳥道風葉亂霜林久  
客登樓目中年懷舊心猶須一長笛領覽自霑襟

元日

老境難為節寒梢未得春一官兼利害百慮孰疎親積  
雪無歸路扶行有醉人望鄉仍受歲回首望松筠

放懷

施食烏鳶喜持經烏鼠聽杖藜矜矍鑠顧影恠伶俜門

靜行隨月窻虛臥見星擁衾眠未穩艱阻飽曾經

送伯兄赴吏部改官

先子初增秩年侵鬢已皤念兄今善繼此別喜如何親  
老家仍困門衰仕未多猶須教兒子早要中文科

寄張文潛

今代張平子雄深次子長名高三俊上官立右螭傍車  
笠吾何恨飛騰子莫量時平身早達未用夢凝香

後湖晚坐

水靜

靜一作淨

偏明眼城荒可當山青林無限意白鳥有餘

閒身致江湖上名成伯季間目隨歸雁盡坐待莫鷓還

送孝忠二首

老眼元多淚春風見此行久為貧賤別更覺急難情斗  
食吾堪老詞場爾向榮未須憐野鷺家法付宣城

經史三年學聰明一旦開把文甘潦倒數日待歸來士  
惠聲名早官今歲月催有親須薄祿臨路尚徘徊

寄張宣州

與世情將盡懷仁老未忘故人今五馬高處謾三長詩  
豈江山助名成沈鮑行肯為文俗事打鴨起鴛鴦

西湖

小徑才容足寒花只自香官池下鳧雁荒塚上牛羊有  
子吾甘老無家去未量三年哦五字草木借輝光

別月華嚴

寓世生同里隨方去有情來為百年別不惜片時程齋  
鉢須勤供經鐘莫倦鳴當來第三會此界却逢迎



送吳先生謁惠州蘇副使

聞名欣識面異好有同功我亦慙吾子人誰恕此公百  
年雙白鬢萬里一秋風為說任安在依然一秃翁

別觀音山主

會合應生理過逢豈近緣情親見今日語妙記當年閉  
戶安禪主衝風逆水船不應清夜月故作別時圓

離韻

河市千人聚寒江百尺牽吾生能幾日此地費三年叢

竹防供爨池魚已割鮮拙勤終不補他日愧無傳

湖上

湖上難為別梅梢已著春林喧鳥啄啄風過水鱗鱗  
緣有三年盡情無一日親白頭厭奔走何地與為隣

病起

今日秋風裏何鄉一病翁力微須仗起心在與誰同  
灾疾資千悟寬親併一空百年先得老三敗未為窮

九月九日魏衍見過

節裏能相過談間可解憂致疎君未肯得此我何由語  
到君房妙詩同客子遊一經從白首萬里有封侯

次韻無斁偶作二首

肩聳三峯峻眉龐八字橫玄談人絕倒家法句新清八  
駿先張子諸公少賈生已傳烏鵲喜欲聽鶻鷁聲

此老三年別何時萬里回更無南去雁猶見北枝梅會  
有哀籠烏寧須溺死灰聖朝無棄物與子賦歸哉

次韻晁無斁除日述懷

世學違從衆名家最近天感時猶壯志得句起衰年  
表酒無何飲陶琴不具絃平生揮翰手幾見絕韋編

次韻無斁雪後二首

閉閣春雲薄開門夜雪深江梅猶故意湖雁起歸心  
草潤留餘澤憲明度積陰殷勤報春信屋角有來禽

取性無通介隨時有異同雪餘蓋地白春淺着梢紅寄

食虛長筭

魏衍注云時先生婦翁郭大夫曹州使宅晁時為州教官

論詩闕近功相

看不相棄賴有古人風

河上

背水連漁屋橫河架石梁窺巢烏鵲競過雨艾蒿光鳥  
語催春事窓明報夕陽還家慰兒女歸路不應長

寄無斁

敬問晁夫子宮池幾許深已應飛鳥下復作卧龍吟待  
我中痾愈同君把臂臨泥塗無去馬夏木自來禽

宿深明閣二首

窈窕深明閣晴寒是去年老將灾疾至人與歲時遷默

坐元如在孤燈共不眠莫年身萬里賴有故人憐  
縹緲金華伯人間第一人劇談連晝夜應俗費精神時  
要平安報反愁消息真墻根霜下草又作一番新

除夜

七十已強半所餘能幾何懸知莫景促更覺後生多遁  
世名為累留年睡作魔西歸端着便老子不婆婆

別寶講主

此地相逢晚他方有勝緣咒功先服猛戒力得扶顛暫

息三支論重叅二祖禪

趙州臨濟  
皆曹人也

夜牀鞋脚別何日著

行纏

老栢三首

并序

勝果院後庭有栢見之二十年矣踈瘦如故余寓其  
舍數以水溉之遂有生意

庭栢無生意摧殘二十秋稍霑杯水潤已與歲寒謀黃  
裏青青出愁邊稍稍瘳會看笙鶴下暮雀莫深投

英姿帶枯槁勁節闕和柔物理有興壞人情成去留稍

看棲鳥集聊待晚風秋解道庭前栢何曾識趙州  
歲月那能記風霜亦飽經槁乾仍故節潤澤出新青色  
與江波共聲留靜夜聽輝輝垂重露點點綴流螢

次韻螢火

年侵觀物化共被歲時催熠熠孤光動翩翩度水來稍  
能穿幔入已復受風回投卷吾衰矣微吟子壯哉

次韻夏日江村

漏屋簷生菌臨江樹作門捲簾通燕子織竹護雞孫向



夕微

一作風

涼進相逢故意存

一作雷衣  
汙垢存

何當加我歲從

子問乾坤

次韻觀月

風雲隨落日河漢欲回天  
隔巷如千里還家已再圓  
簾疎分細細江淨共娟娟  
他日吾何適聽詩說去年

夏夜有懷

卧念張居士逃名老石根  
學詩端得度識字即空樽  
鳴笛夜宜遠燈花曉更繁  
未須哀老子也復守丘園

觸目

溪響饑魚食川明柱影斜  
驚禽穿密竹噪鵲立浮查  
谷暗山藏雨林喧雀啁蛇  
鄉間等行路何處一作更為家

送高推官

先生鍾舊德大府冠羣能  
過手無難事逢人有異稱  
薦賢餘一鷄夙記契千燈  
看挽秦梁纜頭頭數不勝

栢

用直寧論世名成不待官  
低枝緣我有偃蓋到誰看  
秀

色有新故英姿無暑寒要為千載計豈慮萬牛難

捕狼

一狼將四子二嶺走千羊意得無前敵時垂闕後防寧  
知射生手已發弩機張會便烏鳶飽空令豺虎傷

和元夜

笳鼓喧燈市車輿避火城彭黃彭祖樓爭地勝汴泗迫

人清梅柳春猶淺關山月正一作明賦詩隨落筆端復

可憐生

登快哉亭

城與清江曲，泉流亂石間。  
夕陽初隱地，暮靄已依山。  
度鳥欲何向，奔雲亦自閑。  
登臨興不盡，稚子故須還。

春夜

宿鳥一枝足，爭林終日鳴。  
庭花當戶發，江月向人明。  
鳥宿清溪影，風回晚市聲。  
夢中無好語，池草為誰生。

登燕子樓

綠暗連村柳，紅明委地花。  
畫梁初著燕，廢沼已鳴蛙。  
鷗

沒輕春水舟橫着淺沙相逢千歲語猶說一枝花

棟花

密葉已成蔭高花初着枝幽香不自好寒艷未多知會  
見垂金彈聊容折紫綵粉身非所恨猶復得聞思

送河間呂令

子固  
甥

今日中年令當年太守孫獨能憐此老肯避席為門寒  
日風濤壯邊城簿領繁平生子曾子白首得重論

寄潭州張芸叟二首

湖嶺一都會西南更上游秋盤堆鴨脚春味薦猫頭宣  
室來何暮蒸池得借一作惜留孰知為郡樂莫作越鄉憂  
去國如前日為邦得舊游霜柑先落手春鴈幾回頭只  
道風沙惡寧知賈宋留賦詩真有助弔古不同憂

送曹秀才

甲第衣冠後東遷歲月侵情親期一諾急病闕千金孰  
並還家樂毋忘在莒心時能記衰病聲迹到雲林

杜侍郎挽詞三首

美政真吾母名家更杜陵于張從昔少魯衛至今稱絲  
竹中年好詞華夙世能周南棠棣傳平世幾人登

驥駮方懷遠松筠忽有秋雍容名士數終始法家流凜  
凜驚千載堂堂閔一丘能令羊季子不肯過西州

身去風流在人難玉石分平生才一見治行已多聞更  
覺知音少還修地下文他年九原淚仍是兩馮君

黃預挽詞四首

敏慧仍江夏風流更妙年貧焚酒家券病得里胥錢精

爽來鷹隼清明瀉澗漚無兒傳素業有淚徹黃泉  
骨秀神仙數詩清雅頌才識高懸日月韻勝絕塵埃去  
就堪同事摧殘盡一哀了知天上去不似世間來  
志大期千里身宜置一丘英詞真蓋世爽氣已橫秋地  
要黃金骨天成白玉樓平生斲泥手斤斧恐長休  
玉筋凝潮後絲桐藝業餘遠途憎早悟曠度得中疎子  
逝今何遽吾生孰與居豈無文士傳未有茂陵書

秋懷四首



積雨不受暑既晴還得秋未免困河魚寧如喘吳牛風  
梧有先聲巢燕無後留人生行樂爾一經今白頭

小雨斷復續回斜落晚風寒心生蟋蟀秋色傍梧桐草  
與遙山碧花欺晚照紅口須談世事目已失飛鴻

山斷開平野河回殺急流登臨須向夕風雨更宜秋急  
急後飛鴈翩翩不下鷗晚舟猶小待莫雀已深投

梨埒當千戶魚防擁萬頭寧須一網盡不為百人留密  
雨點急水驚風擘繫舟百年供轉徙因病得夸猶

元日雪二首

半夜風如許，平明雪皓然。  
簾疎穿瑣細，竹壓更嬋娟。  
窈兔走留迹，饑鳥鳴乞憐。  
遙忻炎海上，還復得新年。

度臘閱三白，開正還積陰。  
炊煙茅舍濕，噪雀莫枝深。  
短髮千方誤，中年萬里心。  
成書著巖穴，或有後人尋。

闕三  
白作

闕三  
白

送張蘄縣

接祿才餘歲，為邦近故園。  
案圖三萬戶，鎮靜五千言。  
雪

盡春泥滑風生沙水昏猶須放琴客坐席稍能溫

送何子溫移亳州三首

治出龍城守名高水部郎清明人共識風味獨難忘骨  
立秦書瘦鬚粘檜蜜香烹鮮師老耳曳尾肯蒙莊

胄衿曾誦賦皓首始登門意得寧論晚心交不待言向  
來期北上可復改南轅

嘗請湖越  
而得毫

畫地數佳政叢談何

處村

復作中年別仍懷後日憂關山遮極目汴泗只東流政

好遭頻借詩清得暗投會看靈壽杖扶出富民侯

覽勝亭

斷岸通橫水吹花滿繫船中年擅幽獨輟食買林泉草  
木真宜主江山故作妍升沉有流轉且復賦歸田

何太沖挽詞二首

課最三川守名成萬石君平生欠一識聲烈即多聞堯  
率真歸處琴臺只斷雲傷心今夜月忍便到初墳

哀挽諸儒競豐碑故吏繁素車紛雨泣丹旒與風翻幾

地留遺愛他年作九原涕流耆舊盡不獨為鄉園

送大兄兼寄趙團練

貧有分離苦官無早晚宜又為千里別未覺十年遲日

與江山遠風連草木悲平生劉子政見可只一作論詩

送張秀才

學又三年積功收一日長擅場推老手附尾得一作諸

郎度鳥界晴碧過雲回夕黃孰知詩有驗莫愠路無糧

送智叔令咸平

二謝將能事重陽只故臺固須衝節去便恐帶秋回敏  
捷才無盡鋪張意有開猶須記衰疾書與鴈同來

壽安縣君挽詞

兩大推平日三從播後聲憂勤登上壽簫鼓閉佳城總  
布千人從松楸十里行哀榮動鄰里點筆競諸生

寄張大夫

只應青眼老尚記白頭翁一別今何向三年信不通不  
應書字倦未有北來鴻肯作彭城守何時馬首東

懷遠

任淵注云此詩屬東坡

海外三年謫天南萬里行生前只為累身後更須名未  
有平安報空懷故舊情斯人有如此無復涕縱橫

答田生

酒亦有何好人今未肯忘苟無愁可解何必醉為鄉賸  
欲論竒字終能諱秘方直饒肌骨秀正要畫眉長

寄張學士

舜民

湖海三年別譙徐一日間經時猶未見凡事信多艱理

極那湏說情生不自還從來闕聲問相見若為顏

雪中寄魏衍

薄薄初經眼輝輝已映空融泥還結凍落木復沾叢  
意在千山表情生一念中遙知吟榻上不道絮因風

送澶州錄曹宋參軍


宦遊男子事訪別故人情能吏于今少春風及此行英  
雄餘戰伐犴獄寄廉平未肯輕衰疾人來闕寄聲

早春



度臘不成雪，迎年遽得春。  
水開還舊綠，魚喜躍修鱗。  
柳及年年發，愁隨日日新。  
老懷吾自異，不是故違人。

後山集卷四



總校官庶吉士 臣侍 朝

校對官編修 臣閔惇大

膳錄監生 臣吳魯田

欽定四庫全書薈要

集部

後山集卷五

六

詳校官助教臣謝登雋



欽定四庫全書薈要卷一萬五千三百六十二

集部

後山集卷五

宋 陳師道 撰

五言律 五言排律

寄酬咸平朱宣德

智叔

冥冥超世網蔚蔚秀儒林他日熟看面今時初得心白  
頭無故意異代有同音短綆徒施巧終然莫汲深

歸鴈二首

弧矢千夫志，瀟湘萬里秋。  
寧為寶箏柱，肯作置書郵。  
遠道勤相喚，羈懷誤作愁。  
聊寬稻梁意，寧復網羅憂。

作計曾懷早，為生去住頻。  
固違陰嶺雪，不盡洞庭春。  
巧作斜行字，催歸去國人。  
知時如有信，決起亦相親。

和寇十一同遊城南阻雨還登寺山

雨阻遊南步，泥留逐北情。  
稍看飛霧斷，復作遠山橫。  
野潤膏新澤，樓明納晚晴。  
歸宜有佳思，紗帽壓香英。

和寇十一雨後登樓

秀嶺歸雲裏華譙夕照中登臨初一作終不數吟笑近多

同麥秀知春力和驗歲豐豫為逃暑約一快楚臺風

答寇十一惠朱櫻

故人憐一老輟食寄三山厚味非貧具先嘗愧客間甘  
酸俱可口衰白不宜顏句妙那能繼情深未覺慳

元符三年七月蒙恩復除棣學喜而成詩

老作諸侯客貧為一飽謀折腰真耐辱捧檄敢輕投早  
作千年調中懷萬斛愁莫年隨手盡心事許溟鷗

登寺山

晴山堪着眼別意不勝秋小作三年別聊為五斗謀要  
須乘下澤不待到壺頭預恐登臨處長思馬少游

答寄魏衍

往昔敦朋好猶能作報書老衰渾得懶疎密略相如名  
墮網中蝶身隨冰底一作魚填門車馬客左席為君虛

別鄉舊

數有中年別寬為滿歲期得無魚口厄聊復鴈門踦齒

脫心猶壯秋清意自悲平時一作生郡文學鄧禹得三為

爛石村

亂石何年爛千林昨夜黃曉耕來鳥雀麥隴縱牛羊投  
老須微祿持身闕寸長洗心聞吉語時事信難量

別叔父崑山丞

父子兼知己扶攜共白頭又為千里別未使寸心休鳥  
雀空庭曉風霜落木秋近親零落盡更覺別離愁

黃樓



樓以風流勝情緣貴賤移屏亡老畢篆市發大蘇碑更  
覺江山好難忘父老思只應千載後覽古勝當時

寒夜

閉戶風將雨通宵浪打頭若為中夜聽復作別時愁宿  
鴈鳴漁火村春急暗投不應田二頃能使寸心休

住鴈

斷岸通橫水枯荷着早霜一陂堪度歲數鴈不成行市  
遠無矰繳年豐足稻梁中原有佳氣不必到衡陽

寓目

曲曲河回復青青草接連去帆風力滿來鴈一聲先野  
曠低歸鳥江平進晚牽望鄉從此始留眼未須穿

野望

霜葉紅於染吹花落更馨平江行詰曲小徑夾葱青度  
鳥開愁眼遙山入畫屏畏人惟可飲從俗却須醒

寄兗州張龍圖文潛二首

去國遭前政還家未白頭百年當晚遇一辱獨先收齒

脫空餘舌顏衰早著秋三為郡文學大勝鄧元侯  
賸喜開三面旋聞乞一州力難隨鳥翼行復立螭頭今  
日麒麟閣當年鸚鵡洲寄書愁不達書達得無愁

家山晚立

遶舍苔衣積倚墻梨頰紅地平宜落日野曠自多風禹  
迹千年後家山一顧中未休嗟土偶已復逐飄蓬

寒夜

一夜風澎浪中宵月脫雲到窓資少睡遠響倦多聞星

火遠相亂江山氣不分  
早雞先得便斷鴈屢鳴羣

山口

重霧真成雨疎簾不隔風  
青林擁紅樹家鶩雜賓鴻  
漁屋渾環水晴湖半落東  
往來成一老猶在半塗中

晚泊

清切臨風笛深明隔水燈  
堆場穿鳥雀暗溜入溝塍  
年

使一作策倚扶行老船催趁渡  
僧茲遊恐未已着句續先曾

夜雨

十月天猶雨

一作暖

三更月失明  
溟濛才灑潤  
點滴不成

聲闢戶風煙入  
投林鳥雀輕  
旅懷終易感  
倏起別離情

宿合清口

風葉初疑雨  
晴窓誤作明  
穿林出去鳥  
舉棹有來聲  
深渚魚猶得  
寒沙鴈自驚  
卧家還就道  
自計豈蒼生

宿泊口

弱柳輕寒色  
懸流盡夜聲  
更長宜睡少  
霜落怯寒生  
急占星度  
搖搖若舫傾  
風濤兼盜賊  
恩重覺身輕

野望

山開兩岸柳水遶數家村地勢傾崖口風濤噬石根平  
林霜著色沙岸水留痕賸寄還鄉泣難招去國魂

顏市阻風二首

水到西流濶風從北極來聲驅峽口坼力拔嶺根摧突  
兀重重浪轟礧處處雷順流看過舫更着快帆催

萬古梁山泊今年未稱船阻風兼着雪費日亦忘年世  
事元相忤衰懷忍自煎晚來聲更惡始覺畏途邊

晚坐

柳弱留春色梅寒讓雪花  
溪明數積石月過戀平沙  
病減還增藥年侵却累家  
後歸栖未定不但只昏鴉

寒夜

留滯常思動艱虞却悔來  
寒燈挑不燭殘火撥成灰  
凍水滴還歇風簾掩復開  
孰知文有忌情至自生哀

晚興

去國猶能別逢人始欲愁  
不干遮極目自是怯回頭  
布

網收魚摻連筒下釣鉤誰初教鮮食澤竭未能休

宿齊河

燭暗人初寂寒生夜向深潛魚聚沙窟墜鳥滑霜林稍  
作他方計初回萬里心還家只有夢更著曉寒侵

別劉郎

魏衍注云宣義之壻六年之別  
先生喪母劉喪父故其詩哀甚

一別已六載相逢有餘哀公私兩多事灾病百相催無  
酒與君別有懷向誰開深知百里遠肯為老夫來

趙巖



一市萬人聚四衝千里遙胡然不作邑兼自可成橋羣  
盜去無迹諸豪壓不驕由來天下事浮議易傾搖

雞籠鎮

入棣州界

河市新經集雞籠舊得名初聞北人語意作故鄉聲客  
久艱難極情忘去就輕空虛仍廢忘何以慰諸生

除官

秘書省  
正字

扶老趨嚴名徐行及聖時端能幾字正敢恨十年遲肯  
著金根謬寧辭乳媪譏向來憂畏斷不盡鹿門期

送謝朝請赴蘇幕

好合同黃卷情親湏

一作更

白頭胡然落丹墨不坐致公

侯沙軟留徐步

魏本作山合遮西顧塗上白字未注

潮回趁急流平生湖

海興日夜逐行舟

欽聖憲肅皇后挽詞二首

二妃端協帝三后共興周決策天同力收功語不流權  
宜從殺禮未命尚深憂鬱鬱佳城閉終天配壽丘

復辟先元約長年損積憂春移栢城仗仙去帝鄉遊德

並塗革敏功臨馬鄧優千秋修故事車馬戒如流

欽慈皇后挽詞二首

二祧從孝祀五典載虞嬪顯號追先志陰功見後人承  
顏親不待罔極痛如新永有如椽筆光容可得陳

靈岳占佳氣琳宮閔寶衣膺期

一作應祈

符寶歷錫號煥皇

扉日月堯同數謳歌啟與歸傷心五雲去不見六龍飛  
大行皇太后挽詞二首

德名三后並母道兩朝尊勇決高千古危疑定一言先

期還政事隆禮改山園哀挽西郊道雲愁晝亦昏  
扶日行黃道乘雲上紫微憂勞形末命恭儉見陳衣布  
德開刑網和戎戢武威要知懷惠處行路涕交揮

追尊皇太后挽詞二首

欽慈

彤管書陰教皇圖載德容漢宮先夢日代邸近乘龍喬  
岳藏遺服青門啟故封從今祠百世清廟配商宗  
典冊尊徽號欽慈煥德名終身聞舜慕歷月見堯生兵  
衛巖天仗車輿轉帝城故匳脂澤在哀感倍皇情

王察院挽詞二首

施報終何在窮通共一空  
兩言成益友百代仰高風  
終始無遺恨恩榮託至公  
不應埋直氣會見吐長虹

良貴官何與長年死不亡  
身須禦魑魅氣已懾豺狼  
不盡胸中蘊猶堪地下郎  
豈惟吾道慶編簡亦輝光

舅氏新齋

堂因竹柏有花與歲時  
闌欲作終年計長留別眼看  
色侵杯酒重子熟落聲乾  
只有林園主相期耐歲寒

答王立之

每逢無可語暫阻即相求解卷初增氣開懷得寫憂昏  
煙宜帶雨風樹更添秋絕唱猶多和先衰怯一作却後酬

和過田承君

寺古專宜僻居深自作幽興來寧憚遠句苦不緣愁逸  
氣無前足虛懷不繫舟逢人難晤語冒雨亦相求

山口

湖濶疑無地河回忽見山登臨聊自試衰疾致身閑四

壁寧虞盜多方莫駐顏無風回遠笛有月待人還

次韻夜雨

暗雨來何急寒房客自醒驟看燈閃閃擬對竹青青聲  
到江干盡風回葉上聽更長那得晚歌側想儀刑

晦日

人老時情薄春深花意微暄寒南北異風俗古今違即  
事無同異旁觀有是非食蔬如許瘦飽肉未湏肥

登城樓

城郭春容晚因行可當遊飛來雙峽蝶自去一浮鷗峽  
嶮山將合江平水却流同來端興盡且為小遲留

奉賀陳聖子

合譜兒童歲為僚一再秋初聞消息報已作別離憂急  
雪將無路寒江欲斷流相逢寧易得端為小遲留

和王子安至日三首

近節翻多事為家不亦難老成須藥力愁絕向誰寬凍  
雨能妨夢朝霜故作寒衰顏心自了不待鏡中看



物理有終極人情從往還  
陰陽消長際老疾去留間  
申白徒懷惠巢由不買山  
更歌吾和汝風日稍侵顏  
晨起公私迫昏歸鳥雀催  
百年忙裏盡萬事醉間來  
竹雨深宜晚江梅半欲開  
風燈挑不焰寒火撥成灰

送張衡山

昔別青衿子今為白髮翁  
此行何日見多難向來同  
官事酣歌裏湖山秀句中  
風塵莫回首留眼送歸鴻

除夜對酒贈少章

歲晚身何託燈前客未空  
半生憂患裏一夢有無中  
髮短愁催白顏衰酒借紅  
我歌君起舞舞潦倒略相同

庚辰三月上旬登白門閑望

昔別子未任人言詩有神  
預知河嶺阻不作往來頻  
剩喜今猶學湏知祿為親  
五陵花滿眼作意莫禁春

送王君玉赴試

汝穎諸王後風流獨此人  
談鋒豎百戰筆力舉千鈞  
得士吾無愧多聞子未貧  
平生三學士相見定相親

奉送閻醇老推官

古今猶異俗鄒魯尚多儒簿領三年責雲霄一武趨數  
過忘潦倒惜君更斯須說與晁夫子今年雖也無

答李簿

老去才先盡春來酒屢空甘為耕釣手畏作躡屨翁與  
罪寧無說言詩新有功不堪須野鷺似欲吐長虹

九月十三日出善利門

十載都城客孤身冒百艱一飢非死所萬里有生還去

國吾何意歸田病不關共看霜白鬢似得半生閒

送章推官

從事有多譽還家能少留持杯猶頽尾解纜即沙頭好  
事今猶壯論文老自休風埃留我老說與五湖秋

湖上晚歸寄詩友四首

鬢髮難藏老湖山穩寄身却尋方外士招作社中人霜  
葉深於染秋花晚自春無人還有礙詩卷莫辭頻

簔笠宜多病衣冠錯致身清愁偏待客白髮解禁人江

月深留雪山梅借探春興從湖上發詩為道人頻  
功名違壯志戒律負前身劉德長欺客王融却笑人殘  
年憎送歲病眼却逢春杖屨知何向如公未厭頻  
紅綠羞明眼欹斜久病身年齡不待命湖海却留人點  
滴花間露新鮮柳上春情懷將底用詩外不須頻

寄答顏長道二首

薄命猶多難浮生未定居故人憂已矣千里問何如白  
髮羞明鏡青燈怯細書不曾知史館何用索枯魚

貧病憂居士雕蟲累壯夫不能羞齒頰幸免葬江湖疲  
馬甘垂首遊鷹不應呼為誰歸未得山水故鄉居

春晚遊寶雲寺

繁杏青猶小幽花落更香日隨雲雨斷恨與水風長螳  
子何緣鬪蜂兒有底忙山人能棄世遊子不思鄉

夏日書事

花絮隨風盡歡娛過眼空窮多詩有債愁極酒無功家  
在斜陽下人歸滿月中肝腸渾欲破魂夢更無窮

賀關彥長生日二首

吉夢熊羆後名家韋杜旁風霜隨氣節河漢借文章漢  
相功名晚周南德化長欲申千歲祝願奉故人觴

經術宜傳世清明正得秋德優高士傳名重賦家流短  
袖妨妍舞青衫負白頭待看靈壽杖扶出富民侯

錢塘寓居

山水如相識豪華異昔聞聲音隨地改吳越到江分門  
閉蕭蕭雨風催緩緩雲會隨麋鹿去長謝犬羊羣

寄寇荆山

曠士三年別荆山一顧中百千人欲死四六老能工脫  
帽頭應白求田意欲東口須論世事目已失飛鴻

還江山

夜夜滄洲夢歸心劇旆懸呼童買輕舸拂榻下平川  
遡浪潮如鬪凌風岸若牽江鄉厭回首行及棟花天

雜題二首

亂水交如線羣山翠作屏寒輕春稍稍雪盡麥青青霜



草猶疑滑風林漸喜聽生涯鞍馬上歲月短長亭

泥雪纔通脚煙雲復結陰遲留隨處處簾幕靜沉沉去  
鴈懷歸意來禽欲好音稍寬溝壑辱不憚二毛侵

秋後五日應物無詩豈年志俱壯未解傷秋耶以

詩挑之

伏盡暑猶壯秋生涼故遲蟬吟接遠響螢燭度深枝歲  
半身仍健年侵意自悲情知寇公子不作感秋詞

寄晁說之

閱世真難記如君自不忘尚

一作向

於書太簡正以懶相

妨共有還家樂終無却老方莫須憂潦倒未許細商量  
再贈寇司戶

仕宦諸儒底名成一戰中酒為千日計詩費幾生功戲  
馬章臺下呼鷹上蔡東少年豪俠窟杵臼得梁鴻

鉅野泊觸事

蒲港牽絲直平湖墜鏡清順流風借便捷路雪初晴鳥  
度欲何向鷗來只自驚有行須快意安得易為情

東阿

慟哭東阿縣傷心莫與論  
却思當痛日敢望此身存  
舉目人將母回頭影弔魂  
更堪悲手足孤稚滿船門

甲亭

峻壁亭臨水橫陂樹徹山  
兩河惟甲氏數柏共蒼顏  
隨意遊成適回舟月與還  
早知乘下澤不再結青綸

音關

遊鵲山院

積石橫成嶺行楊密映門  
人聲隱林杪僧舍遠雲根  
頓

攝塵緣盡方知象教尊只因羊叔子名字與山存

南豐先生

出守日常

遊是院

### 登鵲山

小試登山脚今年不用扶微微交濟灤歷歷數青徐朴

俗猶虞力安流尚禹謨終年聊一快吾病失醫盧

山因鵲

而名

### 別威德寺

三宿城隈寺輕齋類老禪暫來真偶爾適去更翛然笑

別留春塢行尋下瀨船此身猶斷梗飄泊且隨緣

雜題

春水漲湖田先尋滄瀆船隔江爭問主入市不論錢味  
得尊尤滑香因鼓更便他年棟花落追憶漫流涎

和董判官寺居作

共作東州客同棲古寺深論交非有舊不見解相尋冷  
過清明節悲生故國心此身隨所寄未足問升沉

贈白閣黎

餅錫倦西東歸來一榻空宗乘能自判文學更兼通講  
徹夜堂月定回枯樹風無從叅淨社回首倦飛蓬

舒御史太夫人挽詞

回合蔣山秀佳城去域中珮環無曉日蘋藻自春風斷  
髮人何在捐金事已空遂移男子孝更作直臣忠

和賈明叔秋晚見懷

陋巷少行迹故人車馬稀世情方汨沒吾道肯依違萬  
葉迎風脫孤雲帶月歸獨憐高義在猶肯問柴扉

望夫石

磧戍人何在秋霜志不移無言息媯怨有淚舜娥悲山  
靜雲盤髻江空月印眉誰將望遠意歌作送征詩

夏杪

一室青蕪長終朝靜不譁聖賢開美酒子母破新瓜綠  
篠初翻籜紅蕖稍薦花吐嗟功業晚覽照鬢初華

虞美人草

幽草默通神舊題虞美人長言方度曲應節若翻身律

呂聲相應雲龍氣自親無情猶感會不獨在君臣

沈道院有水墨壁畫竒筆也惜其窮年無賞之者

賈明叔請余同賦

壁間水墨畫為爾拂塵埃草樹精神出溪山氣勢回路  
從沙嘴斷人自渡頭來莫恠知音少牙絃匣不開

同蘇不疑避暑法闕寺

酷暑不可處相將尋畫涼清談廕廣廈甘寢就方牀蓮  
剝明珠滑瓜浮紺玉香因知北牕卧自信出羲皇



和彥詹題遠軒

開牕得遠意興出杳冥間芳草日邊路片雲天外山好  
花和露斲修竹夾藤刪每許南鄰伴時來一寄顏

寄君玉

不見紫霄翁侵尋鬢已蓬倦遊鄉域異歸夢夙宵同愛  
酒貧應甚吟詩老更工清時公道在未足歎途窮

次韻游花洞

遠洞容徐步繁英故壓枝錦衾堆襞積春事向離披作

意真成誤尋芳似較遲預為來歲約及早共瑤卮

夜坐有懷

一作秋懷

瑣瑣重門閉蕭蕭一再更

一作稍稍昏煙集 瑟瑟一再更

短檠昏細字

高枕笑

一作忘

平生來鴈防身早

一作妨身健

秋陽換眼明已

須甘酒力不用占時名

一作永言鄰里舊心肯向人傾

送張芝卿

相逢已偶爾告別更蒼然離合驚時換行藏乃世緣君  
無學干祿我亦賦歸田泗水秋山外長安夕照邊

行次舊縣寄立之

歲晚方奔命  
春期作過賓  
逢君為地主  
顧我拙謀身  
官是三年客  
情緣一日親  
將身隨斗食  
應作未歸人

送晁奉議高郵判官

公族仍前輩  
都城早與遊  
士窮湏祿食  
才大豈身謀  
雪嶺無歸鳥  
冰河有去舟  
平生湖海意  
不為有魚留

獨坐

文章平日事  
風竹暮年湏  
衰疾懸知此  
霜毛不更除  
一

丘吾欲往百畝有如無  
魑魅湏游子乾坤著腐儒  
扣門聞啄木勸酒有提壺  
門逕無行迹秋來不遣鋤

和黃充實石榴花

春去花隨盡紅榴暖欲然後時  
何所恨處獨不祈憐葉  
葉自相偶重重久更鮮  
流珠沾暑雨改色淡朝煙  
著子專寒酒移根擅化權  
愧非無價手刻畫竟難傳

和黃預久雨

甲子仍逢夏連朝雨脚垂  
黑雲玄甲駐鐵騎冷官馳  
映

日還蒙霧懸麻却散絲顏牆通犬豕破柱出蛟螭野潤  
風光秀涼生枕席宜撥雲開日月喫井出虹蜺貧可留  
湏捷恩當記戾屢蒼頭行冒雨赤腳出衝泥詩好聲生  
吻書工手着胠衰年得佳句懷抱頓能移

同道士錢冷然尋澗水源

曉領黃冠子步尋東澗源施筇探清淺垂手弄潺湲岸  
閣殘花片槎留菻漲痕鳳潛丹穴邃龍卧古潭渾修竹  
青垂蔭長蘿翠可捫忽驚穿藥圃不覺到雲根磴外看

飛鳥崖邊見飲猿援琴寫山水布席坐蘭蓀白石支碁  
局青沙籍酒尊醉歌歸路穩洞口月黃昏

五言賀雨

六月鄞江旱焦勞刺史憂戴星趨洞府踏月叩龍湫引  
咎育章設為壇古法修山川將爾徧牲幣豈吾留帝意  
茲回眷神聰俯應求油雲潛感召靈雨忽滂流急勢朝  
翻幕寒聲莫咽溝餘波平浦嶼翠色蔽田疇池閣消殘  
暑閭閻慶有秋邦民無以謝惟起載途謳

後山集卷五

欽定四庫全書薈要卷一萬五千三百六十三

集部

後山集卷六

宋 陳師道 撰

詩 七言律

九日寄秦觀

疾風回雨水明霞沙步叢祠欲暮鷗九日清樽欺白髮  
十年為客負黃花登高懷遠心如在向老逢辰意有加  
淮海少年天下士可能無地落烏紗



次韻李節推九日登南山

平林廣野騎臺荒，山寺鳴鐘報夕陽。  
人事自生今日意，寒花只作去年香。  
巾欹更覺霜侵鬢，語妙何妨石作腸。  
落木無邊江不盡，此身此日更須忙。

送趙教授

東髮相看到白頭了，知公鬢不勝憂。  
可堪親老須三釜，又看儒冠忍一羞。  
平世功名須晚節，向來旬月取封侯。  
北州豪傑知誰健，乞我黃淤十里秋。

贈歐陽叔弼

早知汝穎多能事，晚以詩書託下僚。  
大府禮容寬懶慢，故家文物尚嫖姚。  
只將憂患供談笑，敢望功言答聖朝。  
歲歷四三仍此地，家餘五一見今朝。

徐氏閭軒

倦游梁楚愛吾廬，老寄山林孰與娛。  
想見杖藜臨過鳥，更能赤手縛於菟。  
君寧平世輕三釜，我亦東原有一區。  
擬買嬋娟作歸計，可無堆玉斗量珠。

送蘓迨

胷中歷歷著千年筆下源源赴百川真字飄揚今有種  
清談絕倒古無傳出塵解悟多為路隨世功名小著鞭  
白首相逢恐無日幾時書札到林泉

次韻蘓公督兩歐陽詩

吟聲正可候蟲鳴酒面猶須作老兵豈有文章妨要務  
孰知詩律自前生向來懷璧真成罪未必含光不屢驚  
血指汗顏終縮手此懷端復向誰傾

送趙承議

先生隱德世難名  
晚見諸孫也自成  
潁水向來須好句  
道山今日有宗英  
林湖更覺追隨盡  
巾帽猶堪笑語傾  
勤苦讀書終不補  
未須墻角棄長檠

寄李學士

眼看游舊半東都  
五歲曾無一紙書  
平日齊名多早達  
暮年同國未情疎  
稍尋東剎論茲事  
賴有西方託後車  
說與杜郎須着便  
不應濠上始知魚

寄侍讀蘓尚書

六月西湖早得秋二年歸思與遲留一時賓客餘枚叟  
在處兒童說細侯經國向來須老手有懷何必到壺頭  
遙知丹地開黃卷解記清波沒白鷗

寄亳州林待制

湖海相望闕寄聲雲林過雨未全晴青衫作吏非前日  
白首論文笑後生似聽兒童迎五馬稍修書札問專城  
自聞苦李蒙莊句不復人間世後名

寄送定州蘓尚書

初聞簡策侍前旒，又見衣冠送作州。  
北府時清惟可飲，西山氣爽更宜秋。  
功名不朽聊通袖，海道無違具一舟。  
枉讀平生三萬卷，貂蟬當復自兜鍪。

答晁以道

轉走東南復帝城，故人相見眼偏明。  
十年作吏仍餬口，兩地為鄰闕寄聲。  
冷眼尚堪看細字，白頭寧復要時名。  
孰知范叔寒如此，未覺嚴公有故情。

別黃徐州

姓名曾落薦書中，刻畫無鹽自不工。  
一日虛聲滿天下，十年從事得途窮。  
白頭未覺功名晚，青眼常蒙今昔同。  
衰疾久為今日別，數行老淚灑西風。

次韻春懷

老形已具臂膝痛，春事無多櫻笋來。  
敗絮不溫生蟻蝨，大杯覆酒著塵埃。  
衰年此日常為客，舊國當時只廢臺。  
河嶺尚堪供極目，少年為句未須哀。

東山謁外大父墓

土山宛轉屈蒼龍下有槃槃蓋世翁  
萬木刺天元自直叢篁侵道更須東  
百年富貴今誰見一代功名託至公  
少日拊頭期類我暮年垂淚向西風

次韻晁無斁冬夜見寄

寒窻冷硯欲生塵短枕長衾却自親  
老子形骸從薄暮先生意氣尚青春  
覆杯不待回丹頰危坐猶能作直身  
城郭山林兩無得莫年當復幾霑巾



寄提刑李學士

石渠金馬青雲上東里西門濟水邊上冢過家真樂事  
平時持節富當年成家舊學諸儒問脫手新詩萬口傳  
范叔一寒今若此相逢猶得故人憐

寄杜擇之

杜寄惠  
近詩

詩家兩杜昔無鄰文采風流

一作傳家

世有人疾置送詩驚

老醜坐曹得句自清新興來不假江山助目過渾如草  
木春農馬智專吾不讓衡陽紙貴子能頻

次韻晁無斁春懷

城郭朝陽散積陰郊原注目日青深年衰鷗鷺如今是  
夢斷邯鄲何處尋語鵲飛鳥春稍稍重簾深院晚沉沉  
不辭杖屨衝泥雪未有瓊琚報好音

寄晁無斁

稍聽春鳥語丁寧又見官池出斷冰雪後踏青誰與共  
花間著語老猶能笑談莫倦尋常聽山院終同一再登  
今日已知它日恨搶榆况得及飛騰

次韻夏日

江上雙峯一草堂  
門閒心靜自清涼  
詩書發冢功名薄  
麋鹿同羣歲月長  
句裏江山徒指顧  
舌端幽眇致張皇  
莫欺九尺鬚眉白  
解醉佳人錦瑟傍

送杜擇之

兩父論詩伯仲間  
去思今識謝家安  
曠懷亦苦中年別  
歸翼仍愁行路難  
四壁未堪風雨夕  
百圍已試雪霜寒  
欲逃富貴疑無地  
千丈竿頭試眼看

楊夫人挽詞

晁無  
咎母

初說南奔道路長，湖邊丹旆已飛揚。  
百年積慶鍾連璧，十念收功到淨方。  
絳幔一作帳未經觀宋母，綠衣猶記識黃裳。  
欲圖不朽須詮載，今代誰堪著石章。

桓山

平江如抱貫秦洪，雙嶺馳來欲並雄。  
是物皆為萬世計，闔棺猶有一朝窮。  
林巒特起終烏有，美惡千年竟不空。  
尚有風流羊叔子，稍經湔洗與清風。  
有東坡  
記刻石

答顏生

煩君臨問我何堪，剝欲從君十日談。  
老退不應稱敏捷，顏蒼寧復借紅酣。  
世間公器無多取，向裏宗風却飽參。  
陋巷遠孫還好學，未容光祿擅東南。

送劉主簿

義仲字壯輿

平生師友豫章公，矻矻談君口不空。  
半面相看吾已了，連城增價子何窮。  
三千奏牘諸儒上，四百庵寮一歲中。  
二父風流皆可繼，謗禪排道不須同。

和顏生同遊南山

竹杖芒鞋取次行  
琳琅觸目路人驚  
當年此日仍為客  
病目今來喜再明  
筋力尚堪供是事  
登臨那得總無情  
已知名世徒為爾  
不復緣渠太瘦生

和魏衍同遊阻風

舊說東風末世情  
不應作意斷人行  
絕須一怒催新句  
更可多憂促短生  
勝日着忙端取恠  
妙年得此未須驚  
懸知出處非吾事  
已復星河爛熳晴

和魏衍同登快哉亭

經時不出此同臨  
小徑新摧草舊侵  
欲傍江山看日落  
不堪花鳥已春深  
來牛去馬中年眼  
朗月清風萬里心  
故著連峰當極目  
回看幽徑遶雙林

和三日

苦遭年少強追陪  
病眼看花更覆杯  
夾岫萬人傾國出  
清江一注兩山開  
遊人欲盡驚鷗下  
晚日猶須惡雨催  
更恐明年有離別  
折花臨水共徘徊

答魏行惠朱櫻

開門先得故人書  
稍喜提攜起覆盂  
得句有誰知我在  
嘗新此日賴吾徒  
傾籃的皪霑朝露  
出袖熒煌得寶珠  
會薦瑛盤驚一座  
覓腸藜口未良圖

和黃預病起

似聞藥病已投機  
牛鬪蛇妖頓覺非  
李賀固知當得疾  
沈侯可更不勝衣  
驚逢白壁山千仞  
會見黃金帶十圍  
只信詩書端作祟  
孰知糠覈亦能肥



和黃預感懷

壁立無堪佐子貧，謾修簡牒效慇懃。  
起臨月鏡看生意，卧向晴簷共白雲。  
逸氣不應供潦倒，劇談或致紛紜。  
但令蘓晉禪妨醉，不患何山病破葷。

寄泰州曾侍郎

肇

八年門第故違離，千里河山費夢思。  
淮海風濤一作流真

有道麒麟圖畫豈無時，今朝有客傳河尹。  
是處逢人說項斯，三徑未成心已具。  
世間惟有白鷗知。

答顏生見寄

闕然車馬不聞音，行路艱危已備更。  
問舍求田真得計，臨流據石有餘清。  
江山滿目開新卷，章杜諸人得細評。  
閑處著身容我老，忙中見記識君情。

和黃預七夕

盈盈一水不斯須，今歲相過自作一作踈。  
坐待翔禽報一作回。

佳會徑須飛雨洗，香車超騰水部陳。  
篇上收拾愚溪作，賦餘信有神仙足。  
官府我寧辛苦守殘書。

贈鄭戶部

十載歸來遼海東，江山如舊里閭空。  
時平未覺身難遇，學贍依然說不窮。  
著繡畫行真細事，下車磬折得深衷。  
聖朝未有徐州相，剩作功名跨數公。

世稱青州王相，濮州李相而吾州自

開國至今才有劉李二公為執政爾

九日不出魏衍見過

九日登臨迫閉藏，老懷無限自淒涼。  
山頭落帽風流絕

壁面稱詩語笑香

南山有二謝詩石

衝雨肯來尋此老，拂床聊

待熟黃粱獨無尊酒為君壽正使秋花未肯黃

是日無菊

次韻何子溫祈晴二首

夜半風回雨脚收萬家和氣與雲遊

一作浮

蕭條寒巷荒

三徑突兀晴空聳二樓勝日登臨輕一醉下鄉昏墊肯

同憂江空峽響魚龍冷

一作落

盡放青青極目秋

九虎當關信不傳燒煙才上已回天驅除霧雨還朝一作

晴日畜縮濤波復二川奪目光華開秀句堆場藁結驗

豐年從今更上中和頌少費將軍九萬錢

送王元均貶衡州兼寄元龍二首

先生英氣蓋區中，命與仇謀得老窮。  
又見長身有家法，可辭短簿怒吾公。  
石頭路滑行能速，宣室歸來語未終。  
宛洛風塵莫回首，直須留眼送歸鴻。

先生秀句滿天東，二子緣渠再得窮。  
詩禮向來堪發冢，孫劉能使不為公。  
炎方瘴癘避軒豁，故國山河開始終。  
傳語元龍要相識，江湖春動有來鴻。

元龍亦  
謫金陵

次韻黃生

入竹投窓夜有聲似違殘臘作初正三更爽氣侵危坐  
萬里回風逼發生呵筆小吟撩我老閉門高卧見君情  
只今剩作驚人句頗覺吟邊意未平

雪後

送往開新雪又晴故留臘白待春青稍回松色伸梅怨  
併得朝看與夜聽已覺庭泥生馬一作鳥迹遽修田事帶  
朝星莫年功力歸持律不是騷人故獨醒

送詹司業

學舍論交二十年白頭相對固依然才難孰為吾君惜  
果滿寧容我輩先熟路長驅聊緩步百全一發不虛弦  
故懷未盡還成別飽慣人間不更憐

寄亳州何郎中二首

西南日下共浮雲人事離羣喜勸分已度城陰先得句  
不應從俗未忘葷松篁有節元宜晚桃李無蹊只自薰  
欲入帝城須帝力且尋詩社著詩勳

西原追送未成旬赫赫傳聲已迫人剩欲鈔詩寄來使

尚能拂席致嘉賓孰知簡易歸劉向誰使循良作寇恂  
他日入東專一壑少留餘地許為鄰

寄答泰州曾侍郎

千里馳詩慰別離詩來吟咏轉悲思靜中取適庸非計  
林下相從會有時生理只今那得說交情從昔見於斯  
含毫欲下還休去懷抱何由得細知

送提刑李學士移使東路

襟抱從前相向開倡酬於此未多陪身更寵辱談彌勝



路別東西意自哀  
隱几忘言終不近  
白頭青簡兩相催  
孰知衰老難為別  
聲問應須續續來

隱者郊居

高齋繚繞度雙溝  
老氣軒昂蓋九州  
不為江山開悒快  
正緣風味得淹留  
招攜好客供談笑  
折補新詩擬獻酬  
小摘自鋤稀菜甲  
旁觀虛作不堪憂

寄襄州程大夫

中年為吏晚專城  
不獨身榮府亦榮  
江漢風流見羊杜

相門經術有韋平十年一別音書絕萬里相看骨肉情  
今代龐公入城府定將懸榻與逢迎

送檢法趙奉議

三歲公門不屢過作牋時得問如何及茲去去翻為恨  
向使常常肯謂多勇銳閉房猶著酒切深疾惡反傷和  
贈言竊取仁人號善聽君居長者科

送建州鄭戶部

清江畫舸照新晴鏡鼓喧喧聒市鳴昔日布衣今著繡

他年鶴化只空城  
還朝不待三年最  
得郡何妨萬里行  
歲祿二千親八十  
世間誰有此時榮

奉陪趙大夫遊柏山

後水喧江落渾黃  
晚雲障日作微涼  
笙歌聲裏旌旗動  
羅綺叢中語笑香  
勸相秋郊開稔熟  
摩挲苔壁弔荒亡  
風流一代今山簡  
有底尊前著葛強

寄曹州晁大夫

東方千騎貴當年  
白髮居頭也自賢  
肯廢精神修客主

稍回功譽入章篇虛名不救空一作饑腸厄晚歲仍遭末  
疾纏死去不為天下惜鏡中當有故人憐

送馮翊朱令

三楚風流信有人先聲今已徹咸秦寧為雞口官無小  
欲試牛刀久要新細肋卧沙勤下筋長芒刺眼莫霑脣  
山西一作西州豪傑知吾老為說猶堪舉萬鈞

送孝忠落解南歸

孝忠后山兄子

妙年失手未須恨白壁深藏可自妍短髮我今能種種

晚粧他日看娟娟  
千金市帚寧論價  
萬戶分封信有年  
清白傳家有如此  
歸途寒盡不留錢

寄單州張朝請

平生天上張公子  
尚記門間半面人  
聲烈與風來不盡  
音書無使去難頻  
一言悟主心猶壯  
百巧成窮髮自新  
聞說監河收貸粟  
定傾東海活窮鱗

和趙大夫鹿鳴燕集

趙侯詩律近風騷  
雅意推賢答聖朝  
鴻鴈著行過渭水

鳳凰覽德下虞韶三千著籍今為盛九萬論程不作遙  
不讀世書談世事卧看君自致青霄

和朱智叔鹿鳴席上

三楚風流秀士林英詞從昔動修門充庭初識蒼龍礎  
賜醴行霑白獸樽已上薦書輕一鶚更憑詩力化羣鯤  
千年遼鶴空城郭誰見朱公有異孫

漢大司空朱  
浮蕭人也

酬智叔見贈

老去斯文不更論却因夫子話師門清談不待傾三語

勝日何知共一樽  
逐北我方填坎井  
圖南誰得料鵬鯤  
過逢為說侯芭在  
卧楫生衣犢有孫

再酬

鄉里衣冠不絕人  
近天尺五只清門  
論文正可簪雙筆  
澆舌行看賜上樽  
瓊玖每蒙先木李  
蜩鳩方共笑飛鯤  
固知賢傑當傳世  
下里朱陳亦有孫

敬酬智叔三賜之辱兼戲楊理曹二首

龍爭虎據竟成塵  
只有青樓與白門

青樓謂燕  
子樓也

令宰才

高先得句使君情重數開樽江山故國難留鶴科斗荒  
池可着鯤直使頷鬚渾作白未應投鑷愧諸孫智叔有  
嘆白髮

詩

險韻屢詞費討論真持布鼓過雷門更看九日臺頭句  
未用三人月下樽鏡裏黃花明白髮海邊赤腳踏長鯤  
從來相戒莫打鴨可打鴛鴦最後孫

酬智叔見戲二首

百念皆空習尚存稍修香火踏空門槌腰摩腹非春事



割愛投閑覆上樽白髮情多猶可染

來詩有白髮之歎

驂鸞興

盡却乘鯤上界紛紛足官府也容河鼓過天孫

雨花風葉未宜春私柳官渠白下門每度清溪嘲短髮  
時容使席近芳樽雄蜂雌蝶元非偶野馬遊塵不佐鯤  
若許成功當封賞

事具李侍制席上篇

請看子子與孫孫

寄題披雲樓

使君高會答清秋增飾披雲作勝遊九日再逢堪一笑  
終朝百過更深憂落霞孤鶩知才盡疎雨微雲怯語道

賓主縱賢終少在只今未可壓黃樓

早起

鄰雞接響作三鳴殘點連聲殺五更寒氣挾霜侵敗絮  
賓鴻將子度微明有家無食惟一作違高枕百巧千窮只  
短檠翰墨日疎身日遠世間安得尚虛名

和黃克小雪

度臘侵春亦未遲紛紛款款意猶微霑衣帶潤一作自濕元

無見着物還消不待晞賸欲打牕連夜聽未須迷鴈斷

行飛老來才盡無新語只欲煩君急手揮

和范教授同遊桓山

送客尋山已自仙行談坐笑復忘年平郊走馬斜陽裏

破屋傳杯積水邊洗壁留名題歲月

一作題名  
留歲月

登高著

句記山川風流幕下諸公子縮手吟邊更覺賢

春懷示鄰里

斷牆着雨蝸成字老屋無僧燕作家刺欲出門追語笑  
却嫌歸鬢著塵沙風翻蛛網開三面雷動蜂窠趁兩衙

屢失南鄰春事約只今容有未開花

和寇十一晚登白門

重門傑觀屹相望表裏山河自一方  
小市張燈歸意動輕衫當戶晚風長  
孤臣白首逢新政遊子青春見故鄉  
富貴本非吾輩事江湖安得更相忘

再和寇十一二首

南山樓觀插穹蒼林杪青燈出上方  
形勝自如諸老逝功名隨盡二流長  
馬游從昔哀吾老王粲當年賦異鄉

少日幼心今淨盡多生綺語未全忘

與世相違孰自量資身無策謾多方逢場作戲真呈拙  
誤筆成蠅豈所長名字不歸青史筆形容終老白雲鄉  
何一作須五斗輕千里賴有斯人未肯忘

和李使君九日登戲馬臺

登高能賦屬吾儕不用傳杯擊鉢催九日風光堪落帽  
中年懷抱更登臺江山信美因人勝萸菊逢辰滿意開  
二謝風流今復見千年留句待公來


欽定四庫全書

後山集  
卷六

二十



後山集卷六



總校官庶吉士臣侍朝

校對官編修臣閔懋大

騰錄監生臣吳魯田

騰錄監生臣楊仁基